

摘藻堂四庫全書薈要

集部

欽定四庫全書薈要

集部

御選明詩卷十五

六

詳校官原任事

臣李斯咏

欽定四庫全書薈要卷一萬八千五百十五

集部

御選明詩卷十五

樂府歌行十二

宗泐

風入松

高堂初宵山月明長松颯颯奏清聲清聲希微坐獨聽
援琴細意寫得成調絃轉軫聲方起忽覺松風生繞指
更深鬼哭巖前雲夜半龍吟潭中水一彈一奏聲緩促

有似松風時斷續含商流徵清復哀能使幽人聽不足
聽不足琴忽罷此時寂寂松無風明月滿天涼露下

江南曲

泛舟出晴溪溪迴抱山轉欲采芙蓉花亭亭秋水遠心
非檣上帆隨風豈舒卷但得紅芳遲何辭歲年晚

隴頭水

隴樹蒼蒼隴坂長征人隴上迴望鄉停車立馬不能去
沉復隴水驚斷腸誰言此水源無極盡是征人流淚積

拔劍斫斷令不流，莫教惹動征人愁。
水聲不斷愁還起，淚下還滴東流水。
封書和淚付東流，為我殷勤達鄉里。

春江曲

春江沈沈春水滿，柳條拂水蒲芽短。
鴛鴦睡美不畏人，日色遲遲素沙暖。

楊柳枝詞

百花洲畔覆青坡，第六橋頭蘸碧波。
鳳管龍笙春寂寂，綠陰終日伴漁歌。

長安少年行

日晚新豐醉酒迴，玉鞭敲鐙萬人開。
綠槐馳道橫穿過，不管金吾導騎來。

鬪雞贏得海東青，臂向東街覓弟兄。
白馬翩翩相逐去，霸陵原上曉雲平。

天雨雪

天雨雪出門安所之，渡河正遇風浪惡。
回船少住溪水湄，舉頭見飛鳥斂翮欲下無樹枝。

淮之水送別

淮之水向東流水流只載行人舟舟行如飛水如射一日可到吳江頭何不載此離情去擲向天涯不知處濠梁有客今白頭望斷孤雲海天暮

不羈行贈吳客

倜儻不偶世落魄江海遊雖來京國久不謁公與侯仙人五城高彩雲十二樓天街看明月一身風露秋翩然下揚子棹歌發吳謳太湖三萬頃鳬鴈中沈浮且作拍

浪兒赤脚坐船頭笑指闔廬墓千古成荒丘

來復

秦淮謠送鄭太守歸光州石盤山

金陵古帝州山水天下壯大江九道通秦淮白頭浪蹴
桃花漲一葦不可杭倒浸鍾山青虎石何崔嵬高壓長
干城年年送人此離別官柳條青幾回折冥鴻望斷三
山煙重到憐君頭似雪呼酒鳳凰臺解君金荔枝人生
富貴豈不樂角巾歸里今奚為北渡秦淮水西登石盤

山黃鶴招欲來心與雲俱閒草堂只在青山裏大兒將
車小兒喜斑斕舞彩春當筵斫鱠雕盤奉雙鯉我歌秦
淮謠送君長淮歸乞得閒身謝明主千金不換秋荷衣
莫笑囊無錢留取百篇詩他年太史傳循吏觀風載頌
甘棠詞

好溪漁歌

少微山下萬松青鐵笛携將過水亭吟得竹枝新有譜
秋風吹與老龍聽

良琦

和西湖竹枝詞

西湖遊子那得愁美人日日狎春遊
為人歌舞勸人酒不信春風能白頭

福報

和西湖竹枝詞

貂帽誰家美少年黃金耳環月樣圓
日斜走馬過湖去柳下小娃呼上船

黃妃塔前西日沈
采菱日日過湖陰
郎心只似菱刺短
妾意却如湖水深

德祥

車碌碌

車碌碌車碌碌上山遲下山速
前車行行後車促後車
不管前車覆前車已覆
無奈何後車碌碌何其多

樹上花

昨日樹上紅今日樹上空
樹空人莫惜春風有來日
春

風為花好不惜行人老行人老不再少年不知花落春
風前

折楊柳

小葉柳大葉楊今年折盡明年長明年今日在何鄉春
風吹斷鐵心腸葉葉比君眉條條比君髮朝如青絲暮
如雪能使離人幾回別

柳詞

莫折東風楊柳枝枝間葉葉是愁眉遊人不省愁何事

曾向東風笛裏吹

妙聲

吳宮四時詞

柳色暗閭門霓旌拂晚雲湖邊采香罷就閱水犀軍
何處堪銷夏龍舟過洞庭誰歌采蓮曲江上越山青
金井落梧桐茱萸繞殿紅君王愛秋色多在館娃宮
宮闌夜如何風飄宛轉歌更闌銀燭滅落月在江波

落花歎

朝見紅白花暮見青葱樹不愁花落總成泥但惜人生
不如故滋蘭公子江南客再拜東皇留不得九州塵土
浩茫茫付與楊花作春色東溪野老自忘機坐對落花
吟夕暉猶聞葉上黃鸝語不信東家蝴蝶飛

惟則

竹枝詞

煙消日出江水流江風搖蕩木蘭舟故園望斷不得去
楊柳蒹葭又早秋

道行

車遙遙

車遙遙行人心忙疑路迢廣塵眯目神更亂紅雨點衣
魂欲消車聲似與啼聲續羊腸難比愁腸曲沙頭酒家
不少留匆匆碾破平蕪綠妾身願同楊葉輕春風千里
隨車行

轉應詞二首

新柳新柳掩映溪頭渡口長條未絆遊人正是江南早

春春早春早風雨獨行古道

斜日斜日門外馬蹄聲疾林棲鳥盡飛還霞彩紅銜遠
山山遠山遠莫怪行人歸晚

方澤

古意

孟冬風始寒鴻鴈凌晨飛疇昔嘉樹林枝葉日以稀一
隨氣運變誰能覺其非賢者貴特達在遠諒不違君看
松柏姿歲晚長依依

法果

樂府雜曲

右手折新花左手拋舊枝
舊枝泣相訴訴與新花知

朱妙端

遊仙詞

洞天春暖碧桃芳
瑤草金芝滿路香
吹徹玉簫天似水
笑騎黃鶴過扶桑

竹枝詞

西子湖頭賣酒家
春風搖曳酒旗斜
行人沽酒唱歌去
踏碎滿隄山杏花

橫塘秋老藕花殘
兩兩吳姬蕩槳還
驚起鴛鴦不成浴
翩翩飛過白蘋灘

閨怨

啼鳥驚回曉夢醒
起來無力倚銀屏
蛾眉未得張郎畫
羞見東風柳眼青

春蠶詞

桃花落盡日初長
陌上雨晴桑葉黃
拜罷三姑祭蠶室
漸籠溫火暖蠶房

白苧詞

西風肅肅天雨霜
館娃宮深更漏長
銀臺絳蠟何煌煌
笙歌勸酒催華觴
美人起舞雪滿堂
清歌宛轉飛雕梁
君王沈醉樂未央
臺前月落天蒼蒼

春睡詞

茸茸芳草含新綠
露井天桃錦雲簇
石闌干外早鶯啼

又喚春光到華屋綺窗花影搖瓊瓏玉人夢破春溶溶
雲鬟半蹙鳳釵滑枕痕一縷消輕紅香汗輕輕透衾濕
含情欲起嬌無力海棠庭院鳥聲和睡足東風一竿日
屈安人

登江樓

登高樓兮見西風吹水之潺湲水東去以不回兮客思
歸其何年

楊文儷

折楊柳

昔去臨歧路柔黃綴樹生今來歸故里暗綠與樓平
花起風飄絮條聲巧囀鶯因看攀折處記取別時情

董少玉

子夜歌

涼風吹北窗槐陰深幾許帶露摘荷花笑共鴛鴦語

採蓮曲二首

看山望湖南東風望湖北綽約蕩輕舟荷花減顏色

楊柳遮大隄游女往何處雲破棹歌寒鴛鴦時飛去

屠瑤瑟

南荒歌

南荒古炎徼十月無霜飛停梭悲遠道不用寄寒衣

浣紗女

日暖銀塘綠溪邊出浣紗若耶煙似雨步步入荷花

愛妾換馬

卿愛落鴈姿儂愛飛龍騎日暮別揮鞭男兒何意氣

清溪小姑曲

小姑何代女明妝清溪曲風吹香粉消水映眉痕綠野
廟寂無人日暮飛屬玉

子夜歌

子夜夜轉長簾前月華吐只解歌調工誰識歌心苦清
商激涼風良人在淮楚

春日白苧詞

條風吹花花拂箏上林宮柳聞啼鶯日暖高臺樓落英

翩躚粉蝶雙翅輕梨花細雨不勝情夜月寶瑟杳無聲
遊人連袂出東城杏衫榴裙挾玉笙賤妾不言淚暗傾
別恨縈牽羞獨行

采蓮曲

六橋垂柳兩邊分日暮吳歌隔岸聞祇解蓮花如粉面
不知荷葉是羅裙

妾飛兩槳入清溪杏子春衫一色齊欲採芙蓉貽女伴
何人寄到芰蘿西

遊仙曲

禮罷高真控鶴歸
八琅仙樂月痕微
青天忽墮琉璃色
照見仙人薜荔衣

銀臺珠樹是仙家
綺閣晴嬌四照花
不用安妃裁蜀錦
銖衣多剪赤城霞

天風颯颯步聲虛
一片紅雲控帝居
聞道茅家開夕譙
上元親授太霄書

沈七襄

子夜歌

輕橈蕩北渚中流
拘藕絲藕絲不可斷
纏綿會有時

自君之出矣

自君之出矣孤月鑒
虛牖思君如飛花
隨風不回首

遊仙曲

清溪白石出胡麻
香暖瑤池九影花
見說玄都無甲子
春光常住阿環家

明妃

塞北黃沙入馬蹄
玉關千里雪沾衣
君恩不逐金刀斷
漠漠香魂月下歸

採桑曲

青溪女兒愛羅裳
提筐陌上踏春雲
蠶飢日暮思歸去
不敢回頭看使君

袁九淑

步虛詞

天上春難老人間日易曛
指揮青鳥使親近
碧霞君冠

偃蛾眉月衣裁華岳雲往來靈仗擁仙樂夜深聞

陸卿子

相逢行

白馬驕青雲金鞭拂紅霧相逢不問名各自東西路

徐媛

宮怨

金屋風吹粉黛香夜寒高碧見河梁雙星不向人間照
冷盡梨花白玉牀

脈脈深宮桂殿涼
阿嬌金屋夜飛霜
千金莫買相如賦
白首文君怨已長

文氏

讀書詞

讀既倦兮草草步蒼苔
今縹緲問落花兮多少
怨殘紅兮風掃鳥喧喧
今人稀柳依依兮絮飛
思悠悠兮春歸
惟把卷兮送餘暉

悼懷篇

青青山上松年華不可考灼灼園中花顏色不常好五
月鳴蜩至八月蝴蝶老感物有盛衰豈忍歸腐草

姚氏

竹枝詞

卓女家臨錦水濱酒旗斜挂樹頭新當壚不獨燒春美
便汲寒漿也醉人

項蘭貞

柳枝詞

綠樹陰陰映酒旗，欲牽春色上柔枝。
年年為惜征夫別，折盡東風總不知。

方孟式

將進酒

將進酒，鼓琴瑟，調鳳凰。
如膠漆，斗酒飲醇松竹猶存東。
風不駐，桃李無言青天有月圓。
又缺愁見楊花亂如雪。

陌上桑

鬱鬱陌上桑，泥泥露為霜。
莎畔吟芳草，入戶鳴寒蛩。

鬱鬱陌上桑
弗弗秋風度
故人暫時新
新人容易故
鬱鬱陌上桑
滔滔漢江水
來去牽離情
浩歌北山杞

秋歌

取次小春天
無繇花柳妍
只憐窗下竹
嫋嫋入雲煙
贈郎青銅鏡
持照肝膽清
勿作地下霜
見月始分明

長門怨

葉落空階靜
花開對曉鶯
相思明月影
獨坐數殘更

方維儀

芳山歌

清露下兮更漏起空庭杳兮無桃李烏夜啼兮井上桐
結孤怨兮先照几蕭蕭兮秋風恨離別兮不同雲飛兮
天外望芳山兮思無窮

商景蘭

關山月

秋月開金鏡浮雲散碧空風吹榆戍北露濕柳城東影
滿驚門鵲光沈起塞鴻秦關今夜色應與漢宮同

劉雲瓊

古別離

牽衣惜郎別郎上雕鞍去試問將何之東流汾水處

紀映淮

秦淮柳枝

棲鴉流水點秋光愛此蕭疎樹幾行不與行人綰離別
賦成謝女雪飛香

謝五娘

柳枝詞

近水千條拂畫橈
六橋風雨正蕭蕭
枝枝葉葉皆離思
添得啼鶯更寂寥

姜舜玉

泊濠曲

芙蓉帶結紅鸂鶒
蒂楊柳絲牽紫燕飛
獨棹蘭舟何處宿
年年飄泊待郎歸

馬守真

自君之出矣

自君之出矣，怕聽侍兒歌。
歌入離人耳，青衫淚點多。
自君之出矣，不共舉瓊卮。
酒是消愁物，能消幾箇時。

秋閨曲

芙蓉露冷月微微，小院風清鴻鴈飛。
聞道玉門千萬里，秋深何處寄寒衣。

景翩翩

襄陽蹋銅鞮

郎是襄陽人慣飲襄陽酒未醉向郎言郎醒應回首
漢水自盈盈女男自遠征不知別後夢底夜到宜城
駿馬蹋銅鞮金羈艷隴西郎能重意氣妾豈向人啼

休洗紅

休洗紅洗多紅色減色減無時歸質弱難重染祇將紅
淚共流東裊却無由綴落紅

休洗紅洗多漸成故能無故色殊番將新色妬新新故
故遞相因莫教淺淡尤他人

采蓮曲

十里湖如鏡紅蓮个个香
大姑先戲水蕩散兩鴛鴦
小姑采蓮花莫漫采蓮藕
采藕藕絲長問姑姑知否

怨辭

豈曰道路長君懷自阻止
妾心亦車輪日日萬餘里
妾作溪中水水不離石君
心楊柳花隨風無定跡

青溪曲

昨自建州來僑住青溪北
紛紛白晢郎羣趨願相識

日乘芙蓉車七貴相爾汝妾本吳中人好就吳儂語
石橋橫溪水華月流青天橋上步羅襪可是淩波仙
與歡深夜歸小妹調箏歇並坐結同心引到樓頭月

桃葉歌

儂自喚桃葉儂貌似桃花桃花容易落郎去宿誰家
青樓怨寄郭生

欲歌春望詞誰是知音者門口木蘭舟常繫垂楊下
兀坐掩房櫳捧心詎嬌態聞說金張兒懶出堂前拜

有所思

兩眼斷夕陽兩鬢羞臨鏡
重門閉不開唯與愁相競

王微

仙家竹枝詞

幽踪誰識女郎身銀浦前頭好問津
朝罷玉宸無一事
壇邊願作掃花人

不信仙家也不間白雲春
亂碧桃闌棋亭偶向茅君奕
一局未終花已殘

憶江南

寒沙日午霧猶含
蕭瑟風光三月三
撲地柳花新燕子
不由人不憶江南

西寧侯邸花神

春遊曲

芳草多情王孫未歸遲
我良朋東風吹衣

春愁曲

金衣公子話春愁
幾度留春更不留
昨日漫天吹柳絮

玉人從此懶登樓

無名氏

踏燈詞

見花鏡
雋聲

髻挽烏雲試晚妝
衫裁白氎學霓裳
私邀女伴門前立
不避燈光避月光

直沽櫂歌三首

見黃圖
雜志

天妃廟對直沽開
津鼓連船柳下催
釃酒未終舟子報
舵樓黃蜨早飛來

雲帆十幅下津門
日落潮平不見痕
葦淀茫茫何路泊
一燈明處是漁村

蘼蕪楊柳綠依依
檣燕檣鳥立又飛
賺得南人歸思緩
白魚紫蟹四時肥

廣東歌堂詞

采蓮去時江水深
采蓮歸時江樹陰
中間日出四邊雨
記得有情人在心

鄭夢周

江南柳

江南柳江南柳春風裊裊黃金絲江南柳年年好江南
行客歸何時蒼海茫茫波萬丈鄉關遠在天之涯天涯
之人日夜望歸舟坐對落花空長歎但識相思苦那識
行人行路難人生莫作遠遊客少年兩鬢如霜白

征婦吟

織罷迴文錦字新題封寄遠恨無因相逢空有遼陽客
每向津頭問路人

客中行

潮落潮生漸遠行不堪回首望松京
海門千里來相送只有青山最有情

徐居正

古意

海底珊瑚高幾丈千年試作千尋網
萬牛挽出滄溟深蛟龍怒號霹靂響
扶桑日浸紅濤熱光華照耀黃金關
李倫本是鹿麕男兒金椎一擊紛如雪

成覩

木綿詞

江南木綿色逾白晴雪紛紛鋪簾席小機搖作鴉櫓聲
軟弧彈罷秋雲積殷勤少婦坐夜闌風吹紛絮紫烏鬟
絲僵水澁機杼促軋軋輕梭玉指寒肝膽欲絕愁難絕
孤燈閃閃光明滅半將裁剪小兒衣半將裁剪寄金微
銅壺催曉眠不得淚水點點明羅幃

成侃

囉嘖曲

為報郎君道今年歸未遲江南春草綠是妾斷腸時

許筠

牽情引

熊州樓觀飛雲外白簡霜威凌皁蓋組練三千引繡衣
羅裙二八鳴珠帶九華之帳香氤氲寂寂瓊樓午夜分
苧里佳人嬌薦枕巫山仙子渺行雲牽情夢罷看歸路
別恨迢迢隔煙霧妾心苦作藕中絲郎意何如荷上露

錦水東西楊柳新往來愁殺斷腸人欲將心事寄青鳥
芳草年年空復春

許筠

益珠曲

雲窗霧閣何夜長湘簾明月低銀牀玉斧真人年正少
羅衾好綰雙鴛鴦蘭燈熒熒照畫閣欄外絳河猶未落
宿香乍染翡翠衾嬌雲未散芙蓉幕佳人風骨廣寒仙
霞裾六葉栽輕煙羽蓋朝朝向玄圃蟠桃花發三千年

金宗直

會蘇曲

七月望日新羅儒理王使王女各率六部女子績
于廣庭八月望日乃考其工負者設酒相與歌舞
百戲皆作謂之嘉俳是時有負家女子起舞而歌
曰會蘇後人因其聲而作歌云

會蘇曲會蘇曲西風吹廣庭明月滿華屋王姬壓坐理
繅車六部女兒多如簇爾筐既盈我筐空醜酒擲掄歌

相逐一婦歎千室勸坐令四方勤杼軸

黃昌郎

黃昌郎即非清郎也八歲時為新羅王殺百濟王
乃往百濟舞劒於市觀者如堵百濟王聞而奇之
召入宮令舞劒因刺殺百濟王後人作假面以象
其舞考之傳史絕無左驗今觀其舞周旋顧盼望
之凜凜

若有人兮方離韶身不三尺一何驍平生汪錡我所師

為國雪恥心無憊
劒鐔向頸股不粟
劒鐔指心目不搖
嗟爾千乘如蓬蒿

華山畿

塚上青青連理枝
行人爭唱華山畿
野棠花發當寒食
幾度春魂化蝶飛

無名氏

四時詞

門巷清明燕子來
綠楊如霧掩樓臺
同遊女伴鞦韆下

更向花間鬪草迴

五色絲針倦繡窠
玉階新發石榴花
銀牀冰簟無餘事
盡日南園蛺蝶多

金井梧桐下玉欄
琵琶絃緊不堪彈
欲將寶鏡勻新黛
捲上珠簾怯早寒

錦幕圍香寶獸危
曉妝臨鏡澀胭脂
繡籠鸚鵡嫌寒重
猶向簾間覓侍兒

步虛詞

三角戔戔鬢上綃散垂餘髮過纖腰須臾宴赴西王母
一曲鸞簫向碧霄

青銅結伴婉凌華夜下三洲小王家閒說紫陽宮裏事
玉階偷折碧桃花

王母雲車五色麟白鸞前導向西巡天章曉奏虛皇殿
仙桂花開八萬春

仙島焚香禮玉虛紫麟催駕五雲車西宮侍女多嬌笑
錄盡三天未見書

西嶽真君上紫微百靈奔走備威儀三清秘訣無傳授
偷寫天章半夜歸

三壇中夜講真經大集羣仙列下庭唯有老君修別殿
手書雲篆送玄冥

成氏

竹枝詞

灤東灤西春水長郎舟已去向瞿塘巴江峽裏啼猿苦
不到三聲已斷腸

楊柳詞

青樓西畔絮飛揚
煙鎖柔條拂檻長
何處少年鞭白馬
綠陰來繫紫遊韁

條妬纖腰葉妬眉
怕風愁雨盡低垂
黃金穗短人爭挽
更被東風折一枝

俞汝舟妻

貧女吟

夜久織未休
戛戛鳴寒機
機中一足練
終作阿誰衣

金
五
人
卷十五
賈客詞

朝發宜都渚北風吹五兩船頭各澆酒月下齊盪槩

趙環妾李氏

採蓮曲

南湖採蓮女日日南湖歸淺渚蓮子滿深潭荷葉稀
盪槩嬌無力水濺越羅衣無心却回棹貪看鴛鴦飛

許景樊

望仙謠

王喬招我遊期我崑崙墟朝登玄圃峯遥望紫雲車雲
車何煌煌玄圃路茫茫倏忽凌天漢翻飛向扶桑扶桑
幾千里風波路阻長吾欲舍此去佳期安可忘君心知
何許賤妾徒悲傷

古別離

轉轉雙車輪一日千萬轉同心不同車別離時屢變車
輪尚有迹相思獨不見

鳳臺曲

秦女侶蕭史日夕吹參差
崇臺騎彩鳳渺渺不可追
天地以永久那識人間悲
妾淚不可忍此生長別離

望仙謠

瑤花風細飛青鳥
王母麟車向蓬島
蘭旌蕊帔白雉裘
笑倚紅欄拾瑤草
天風吹擘翠霞裳
玉環金珮聲琅琅
素娥兩兩鼓瑤瑟
三花珠樹春雲香
平明宴罷芙蓉閣
碧海青銅來白鶴
紫簫聲裏彩雲飛
露濕銀河曉星落

湘絃曲

薰花泣露湘江曲
點點秋煙天外綠
水府涼波龍夜吟
蠻娘輕夏璫
瓏玉離鸞別鳳隔
蒼梧雨氣浸江迷
曉珠神絃聲徹石
苔冷雲鬟霧鬢啼
江妹遙空星漢高
超忽羽蓋金支五
雲沒門外漁郎唱
竹枝銀潭半挂相
思月

四時歌

春歌

院落深深杏花雨
鶯聲啼遍辛夷塢
流蘇羅幕春尚寒
博山輕輕飄香一
縷鸞鏡曉梳春雲
長玉釵寶髻蟠鴛
鴦

斜捲重簾貼翡翠金勒雕鞍歎何處誰家池館咽笙歌
月照清尊金叵羅愁人獨夜不成寐鮫綃曉起看紅淚
夏歌

槐陰滿地花陰薄玉簟銀床敞朱閣白苧新裁染汗香
輕風灑灑搖羅幕瑤階飛盡石榴花日轉晶簾影欲斜
雕梁畫永午眠重錦茵扣落釵頭鳳額上鵝黃膩曉妝
鶯聲啼起江南夢南塘女兒木蘭舟採蓮何處歸渡頭
輕橈漫唱橫塘曲波外夕陽山更綠

秋歌

紗幘爽氣殘宵迴
露滴虛庭玉屏冷
池蓮粉落夜有聲
井梧葉下秋無影
金壺漏徹生西風
珠簾唧唧鳴寒蟲
金刀剪取機上素
玉關夢斷羅帷空
縫作衣裳寄遠客
蘭燈熒熒明暗壁
含啼自草別離難
驛使明朝發南陌

冬歌

銅壺一夜聞寒枕
紗窗月落鴛鴦錦
烏鴉驚飛轆轤長
樓前倏忽生曙光
侍婢金餅瀉鳴玉
曉簾水澀胭脂香

春山欲描描不得欄干佇立寒霜白去年照鏡看花柳
琥珀光深傾夜酒羅帳重重圍鳳笙玉容今為相思瘦
青驄一別春復春金戈鐵馬瀚海濱驚沙吹雪冷黑貂
香閨良夜何迢迢

塞下曲

寒塞無春不見梅邊人吹入笛聲來夜深驚起思鄉夢
月滿陰山百尺臺

西陵行

錢塘江上是儂家五月初開
菡萏花半彈烏雲新睡覺
倚欄間唱浪淘沙

機先

長相思

長相思相思長有美人兮
在扶桑手攀珊瑚酌霞氣
口誦太乙朝東皇鯨波摩
天不可航矯首欲渡川無
梁去時遺我瓊瑤章蠻牋
半幅畫鴛鴦鴛鴦不飛墨
色改攬涕一讀三斷腸前
年寄書吳王臺西湖楊柳
青如苔今

年東風楊柳動鴻鴈一去何當回欲彈朱絃絃斷絕欲
放悲歌聲哽咽孤鸞夜舞南山雲花漬簾前杜鵑血思
君不如天上月夜夜飛從海東出月明常傍美人身美
人亦近明月輪褰衣把酒問明月中宵見月如見君長
相思長如許千種消愁愁不已亂絲零落多頭緒但將
淚寄東流波為我流入扶桑去

御選明詩卷十五

欽定四庫全書薈要卷一萬八千五百十六

集部

御選明詩卷十六

五言古詩一

劉基

感懷

驅車出門去四顧不見人
迴風捲落葉颯颯帶沙塵
平原曠千里莽莽盡荆榛
繁華能幾何憔悴及茲辰
所以芳桂枝不爭桃李春
雲林耿幽獨霜雪空相親

東園多桃李擢幹何交加春秋互遞代衰榮競相夸
撼去故物英英發新花花謝葉復作空令人歎嗟

結髮事遠遊逍遙觀四方天地一何濶山川杳茫茫衆
鳥各自飛喬木空蒼涼登高見萬里懷古使心傷佇立
望浮雲安得凌風翔

種苗甫田中其葉何離離上天降膏澤溥博無偏私
人力苟不至不如茅與茨嘗恐嘉實晚坐傷零露滋徘徊
感節序太息秋風時

詠史

凱風扇朱夏草木生清涼
卧疾澹幽曠白日悠且長
散帙觀古人喟焉想虞唐
陽春能幾何陰氣多繁霜
天道諒悠悠人理亦茫茫
詠歌寄深情歌罷增慨慷

美人皎如玉挾瑟升高堂
泠泠向長風操作孤鳳凰
曲度未終竟玄雲蔽穹蒼
走獸駭赴林飛鳥號且翔
高山與流水日暮空淒涼

感寓

暑退生夕涼褰衣步微月風來竹陰動草暗螢光發佇
立忽懷人江河渺難越

庭前金鳳花向晚爭媚嫵但見白露滋豈知繁霜苦芳
時良可惜此物何足數

白露下木葉淒涼江海秋江皋有鳴鴈噉噉安所求稻
梁日蕭索風雨徒離憂

招隱

豫章長干仞挺生崇崖陰布葉連青雲交柯蔽層岑結

根豈不固斤斧將見尋有柏生石間屈曲叢灌林古根
齧飛溜電火焚中心大不中梁柱小不堪瑟琴風霜自
搖落偃蹇獨至今

流水千百折白雲三四峯上有噴壑泉下有淩霜松中
有一老人坐嘯巖間風素髮垂兩肩朱顏映青瞳年紀
將百齡容貌如孩童長跪前致辭子非列仙翁笑謂汝
孺子語汝使心通我生不偶俗遺身在蒿蓬結廬白水
邊采藥青林中世語我不接世士我不逢簞瓢我不憂

軒蓋我不崇自耕足我食自息安我躬冥冥絕思慮默
默全和沖持此攝吾生仰荷元化功何必插羽翰遠逐
浮丘公再拜受斯言廓然如發蒙投簪謝知己一去無
回踪

有客歎我廬身披紫雲袍鳴騶列前後從者皆俊髦坐
我蓬華下向我談伊臯手斡北斗魁足踏東海鰲高視
六合內泰山等豪毛揮袂起謝客且還飲我醪醉卧不
知曉衡門塞蓬蒿

晨詣祥符寺

上馬雞始鳴入寺鐘未歇
草際起微風林端澹斜月
僧房湛幽寂假寐待明發
松逕斷無人經聲在清樾

早發建寧至興田驛

雞鳴戒晨裝上馬見初日
露泫葉尚俯霧重山未出
客塗得霽景緩步非縱佚
矧茲歲有秋高下俱穎粟
牛羊散原野鵝鴨滿阡衍
懷抱既夷曠神情自清謐
寒花蔓籬落候蟲響蒙密
霞標青楓林雪綻烏臼實
幽覽雖云

金
卷十六
遽佳趣領已悉我行固無期況乃塵事畢

自衢州至蘭溪

秋郊斂微雨霽色澄人心振策率廣路逍遙散煩襟疎
煙帶平原薄雲去高岑湛湛水凝碧離離稻垂金薺麥
霜始秀玄蟬寒更吟幽懷耿虛寂好景自相尋心契清
川流目翫嘉樹林歌傳滄浪調曲繼白雪音仙山在咫尺
早晚期登臨

遣興

避地適他鄉，息肩謝羈束。生事未有涯，暫止聊自足。
南園實清曠，可以永幽獨。層樓面羣山，俯見湖水綠。
雜英被郊甸，魚鳥得棲宿。登臨且慰意，未暇計遠躅。
聖賢有遺訓，知命夫何卜。

迂疎乏世用，矯情非所安。投簪謝時輩，聊得心中寬。
回首望故鄉，枳棘日以繁。譬彼水上萍，隨波且盤桓。
樓頭好山色，晴雨皆可觀。未知明朝事，且盡今日歡。

琴清堂詩

亭亭嶧陽桐斲為綠綺琴絃彈我白雪音虛
堂夜迢迢華月耿疎林鳳凰天上来虬龍水中吟曲罷
起太息無人知此心

題山水圖

江上何所有高低千萬峰結廬覆以茅取足聊自容綠
樹既蓊鬱清溪亦油溶地僻無車馬猿鳥多相從日落
沙際明寒煙澹疎松蒼茫雲霞外隱見青芙蓉悠然一
舸還好景時獨逢歸來山月出古剎鳴昏鐘

晚同方舟上人登師子巖作

落日下前峯，輕煙生遠林。
雲霞媚餘姿，松柏澹清陰。
振策縱幽步，披榛陟層岑。
槿花籬上明，莎雞草間吟。
涼風自西來，颼颼吹我襟。
榮華能幾時，搖落方自今。
逝川無停波，急絃有哀音。
顧瞻望四方，悵焉愁思深。

偶興

勞人怨長途，壯士悲老別。
那將望鄉心，對此傷神月。
淒涼寒風至，惆悵芳草歇。
瑤琴無子期，絲絃為君絕。

旅興

初秋積雨過衆綠光如濡莎雞啼高樹蟋蟀鳴階除時
物已改故芳華從此徂榮名非我願守分敢求餘登樓
眺遠郊肆目望天衢明月出雲中照我華髮疎還歸掩
關卧夢到田園居

窮巷屏人跡開門見青山青山似故鄉客子何當還蟋
蟀日夜鳴綠樹亦已殷白日駛西征浮雲不可攀安得
生羽翼奮飛出玄間

久雨得晚霽豁然如醉醒幽光銜餘紅遠峰出孤青獨
坐無與娛蜻蛚吟空庭良辰能幾何逝者忽如傾歎歌
欲自慰歌竟還傷情

微風振簷鐸瑒如環珮響登高看秋色俯見明月上木
落天地寬雲散川原廣來者不可期逝者日已往離居
豈無懷惻愴縈遠想

薄雲斂微雨返照涵空煙黃葵間紅蓼爛若濯錦鮮老
病苦無歡坐為憂所纏自恨非松喬不能還少年援琴

寫此曲曲盡心茫然

疎慵厭人事疲病畏交遊得閒願已愜敢有分外求
開門對鍾山山翠盈我眸日中市聲遠草綠空庭幽登臨
觀萬象玄理足可搜誰能走逐逐自使生悔尤

別離多苦懷三年當百載來者非所知往者今安在浮
雲旦夕起白日埋光彩天地亦有形豈能長不改去去
東園公紫芝猶可採

人生如浮雲聚散無定期驚風一飄蕩各自東西之聚

繁陵茗花淒淒寒露時浮雲不可駐顧盼空齋咨

青青瀟湘竹猗猗被寒水遊子如飛蓬佳人曠千里登
高左右望但見黃塵起鳳凰翔不下梧桐化為枳傷懷
不可道憂念何時已

烏鳴朝啞啞鵲鳴暮啾啾聞鵲既不喜聞烏復何憂世
人務苟得君子絕外求滄浪迅風波無風即安流胡為
自冰炭以貽達者羞

寒燈耿幽幕蟲鳴清夜闌起行望青天明月在雲端美

人隔千里山河杳漫漫玄雲翳崇岡白露凋芳蘭願以
綠綺琴寫作行路難憂來無和聲絃絕空長歎

泊舟嚴子瀨遙望仙華山中有騎羊人皓齒頰玉顏餐
霞飲沆瀣坐石濯潺湲長嘯起天風落日為之還悠悠
隔雲雨杳杳不可攀

日落天氣涼逍遙步庭墀蟋蟀已在宇鴻鴈來何遲少
壯輕遠遊衰老傷別離念我親與友各在天一涯音容
兩契濶悲歡絕相知鍛羽還舊林戢鱗思故池百年能

幾何逝者無還期
俛仰增感歎
有懷當語誰
殷勤託宵夢
聊用慰所思

鍛羽畏高風
疲馬厭長道
玄陰促暮節
何物能不老
自非松柏質
敢冀出衆草
登山臨流水
及此晴日好
春芳藹蘭蕙
秋實粟稂稻
黃精肥可食
石泉清可澡
榮名何足言
息心以為寶

客愁常突兀
今夜燈花生
雖知無喜報
愁亦暫時平
解襟成獨寢
留燈待天明
喜固不可求
客心恒畏愁

宋濂

和胡古愚擬宮體

天上多春色人間迴不同
花翻鳩鵲殿鶯過建章宮
雲旂驚被影月扇雉含風
遙瞻翠華近紅日照盤龍

憶山中

平生絕俗尚幽期在一壑
銜卮周曲汜班坐蔭蘭薄
日嫣花欲笑風迅燕飛弱
疎峰挺飛莖平楚下飢鶴
厓傾石似行澗折泉如約
何時稅塵鞅賦歸躡棧屨

清夜

弱志苦清夜奈此強慮嬰反側不能寐稍寐忽成驚疎
櫺生遙素恍疑曙光升起行盼層霄月華流空明繁露
方塗塗嘉樹尚冥冥曳履步庭除東西錯緯經寥落直
至旦飄零歎何營

游覽雜賦

輕舟疾於馬蕩此修渚湄但見山西行不知舟東移汀
花疊相迎欲折隔漣漪亭亭思美人泯泯忘世機多情

有白鳥先後掠人飛

別後不見山比昔山如長林陰沒鳥影巖聲
苔人響蘚色青染足藥花大如掌蛇徑已盤
百石扉始開兩獨笑睨層旻古今一俯仰

幽厓不知日濕氣晴猶重苔列無文錢隨陰
貫寒洞發嘯破玄靄萬象爭迎送磴危石欲
舞雲走如山動思招幽鳥下驚飛夏新晴

和劉伯溫秋懷韻

浚川泉竇疏不浚川乃塞鑿牖漏簷明弗鑿坐深黑感
此益自愧空負軀七尺近方學心齋萬動一時寂面對
天關山終日如賓客默默兩無言巖姿澹將夕

我家潛溪曲正面溪上山揉桂作闔廬文杏為重關新
栽二尺松毳毳雜黃管白鶴寄書來問我何當還移之
萬仞岡瘦骨撐孱顏

題王允岡山齋

幽人宅一區卜築在陽羨銅官矗蒼翠白雲遞隱見溪

水挹村沅觸石成洄漩鶴巢古松枝魚唼殘花片清景
樂高閒雅情任狂狷山林足肥遯軒車忘慕戀心靜養
長年世榮倏驚電寄言謝逋客重修逸民傳

陶安

述寓

夙志慕前矩琴趣愧難續棄米曾賦歸云何效奔逐
慈親日向老無以報鞠育明經不取士奉養心未足攜家
客秦淮蒼苔蔽荒屋年豐公廩虛半載不沾祿妻子樂

我貧朝夕共饘粥母心愛兩孫每食分鼎肉自憐頭上巾興到無酒漉怡然坐窗下一笑對秋菊

登龍泉山得海字韻

蒼峰倚重霄萬古色不改神龍去已遠蹤跡隱然在石面常出泉土脈本通海寶坊起樓閣氣清地爽塏佳菊金蕨莪古木青晻靄攀磴行復坐瑤草鮮可採賓朋觴詠間氣味似蘭茝談笑有佳趣巖壑被光彩嘉會有幾何不醉復何待

次韻劉彥炳典籤感秋

涼風肅庭戶愛此山氣幽森然林間葉條爾水上浮維
天有四時高爽莫若秋中情苟恬晏無勞慕丹丘

我本隱逸人手種籬菊黃養真亦好道忽已五十霜夜
涼不能寐稽古燈在牀天明驅馬出秋興滿江鄉

孤桐倚絕壁長養材質奇截為焦尾琴奏成白雪辭倘
非爨下聲知者復誰其物固有佳遇待時何足悲

九月霜未降青溪尚瀰漫驚飈颭蒲柳蒼桂秀團團倚

杖觀白雲孤飛自往還窮達聽天命怡然絕憂歎

九日登高翠微亭分韻得滿字

山川甚雄麗積雨為磨澣天開秋氣清遊娛共蕭散石
徑接巉巖興到行不懶微霜護新晴杲日送餘暖層嶺
躡高寒境勝世所罕蒼茫四無極自恨目力短危亭基
蘚殘麋鹿荒町疇居然龍虎勢城郭在平坦崇阿弔離
宮老木蔭僧館松雲引徐步蘭露入清盥况當重九節
野菊相留款賓朋笑語間文理謝雕纂好風襲尊俎幽

鳥呀絲管人生光景速每恨樂事緩嘉會幸一逢何辭
累觴滿

夢覺

夢覺山雨來萬點擊虛瓦泠泠玉磬音隨我霸枕下回
颺撼松濤曲奏迭高雅此身卧鉤天傲睨洞庭野造物
慰孤寂作意為陶寫殘夜破幽闌心耳俱洒洒清吟荅
洪調勿謂和者寡

當門小山

山脚踏牆頭全身盡呈露殆類知已人豁達吐心腑秀
色排闥入意多默無語晚來白霧起對面不得覩夜坐
虛簷下惆悵失佳侶曉翠忽舒顏為爾早開戶

王禕

雜賦

驅車適秦京策馬來燕國所見何堂堂莫非侯與伯甲
第金張家乙觀王謝宅旌節出廣衢百步人辟易威權
自其口氣燄何烜赫安知公餽傾反掌遂狼籍魯連彼

何人肆志寧自適

梧桐生巖陽下俯清澗潄柯葉雨露滋鳳凰宿其陰稟
材一何良栽作綠綺琴被以絃朱絲綴以徽黃金澹然
三尺中實涵太古心唐虞世已遠末代崇哇淫匪無南
風曲欲鼓孰知音

終朝飲醇酒舉杯易成醉終日讀古書撫卷不成寐義
理一何深歲月一何駛功名實外物山林乃吾事昨夜
西山雲秋雨生爽氣笑指二尺檠終當勿相棄

門前兩松樹千尺何青青白雲枝間宿縹緲姿態生驚
飈來吹拂復作笙竽聲物情豈有適偶爾相合并須臾
遂分散彼此各無情因之感世故超然欲忘形

次韻友人山居秋日就述鄙懷

月出東嶺光風來西樹聲秋景倏然異令人心意驚君
子有所蘊失時終不鳴獨憐青鏡中白髮日夜生

白髮容易生况復聞秋砧觸物動深感感此歲月深子
期詎堪鑄舉世誰知音取琴為君彈請彈梁父吟

南康郡齋書事

郡廨新落成繁木陰階祀稍欣吏牘稀麓覺民事理簷
雀不相猜羣飲硯池水

長安雜詩

崔嵬終南山形勢甚磅礴西來挾崆峒東亘聯華嶽長
雲覆重巒紫翠入寥廓杞梓產深林龍蛇蟄幽壑淑靈
之所鍾宜有異人作如何千載間蹤跡轉蕭索姬旦不
復生三代已云邈後來王佐才勞我思景略

渭水何湜湜涇水雜泥淤其源各異出其末乃同趨清
濁既以混終然成合汙人生實異此稟性同厥初所習
日益遠竟爾分賢愚安得涇渭水清濁永相殊

昔在元世祖分地王關中潛藩富才彥一一皆夔龍誰
歟任儒學先正推許公沾濡布教雨鼓舞振文風後來
踵其軌厥稱蕭與同發揮聖賢道張主皇王功出處雖
異致德義非殊宗至今關輔間教思藹無窮前哲曰云
遠悵望吾焉從

羣經載聖道昭揭如日星秦火一何烈燒燔滅其形漢
儒事掇拾區區補殘零雖然有遺闕其功亦已宏唐世
尚文學君臣益留情琬琰刻文字後先十二經謂茲金
石堅不與竹帛并自從鴻都後此刻最為精羅列黌舍
內奎壁映晶瑩我言金與石有時亦銷崩有形必有弊
斯理詎難徵安知聖人道所託非所憑天地共終始猗
歟罔能名

人生百年中窮通無定跡譬如風前花榮謝亦頃刻當

時牧羊豎尊貴今誰敵憔悴種瓜翁乃是封侯客丈夫
苟得時糞土成拱壁一朝恩寵衰黃金失顏色古昔諒
皆然今我何太息

五月余還至渭南適克正博士為丞於茲賦詩
道舊并以留別

曩余客南京結交盡名友文采競聯翩氣義互纏糾子
也時所需翻然起江右譬如豐城藏紫氣映斗斗神物
一朝伸光價孰能扣五年教成均後學資善誘紛紛貴

游子成材鬱先後交契豈不多於余誼尤厚誓偕古尊
壘共棄俗盆並世情略外緣古道堅素守艱難互嗟咨
疑惑同析剖黷齋夜鐙苦輦路晨轡偶蹉跎歲年深顏
面俱老醜我從去年秋將指事西走今春子亦出丞哉
實為負豈期清渭濱乃此獲攜手始晤含悲辭稍坐開
笑口既慙徐孺榻且酌陶潛酒問勞益情傾談諧仍意
趣延留甚殷勤未厭浹旬久會合烏可常別離諒非苟
炎埃滿征塗我馬不堪趣明當復東邁行止庶無咎上

以奉明君下以慰慈母平生功名心蕭條亦何有惟是
故意長欲報乏瓊玖英英華陽雲勞我重回首

汪廣洋

別知己

北風吹征帆飄飄西南馳山川聿修阻霜露忽淒其今
我遠行邁豈不念歲時翩彼晨飛鴻翱翔亦何之感我
同袍友感感懷化離化離雖可懷觴酒當載持各言崇
令德金石以為期

明發

膏車待明發，逶迤上河梁。
親朋羅祖餞，冠蓋燦成章。
條風被原隰，春日當載陽。
鳴鳥餘好音，雜葩紛衆芳。
魴魚始登薦，旨酒屢充觴。
旣醉復賸言，欲去故徬徨。
維周仲山甫，王命慎所將。
夙夜無有懈，庶幾終允臧。
斯言啓深省，曷哉何日忘。

壯遊奉簡諸閣老

壯遊吳楚外，揚舲溯天風。
名山浮紫翠，大江走蛟龍。
歷

覽思超越毛骨生冰雪脫巾漉清湍舉手弄明月明月
懸青銅古人難再逢牛渚委陳迹蛾眉斂愁容九華舞
僂僂窺見滄溟底小孤立亭亭徘徊女蘿裏沅宕鄱湖
湄巒峯愈出奇幽深構樓閣峭絕挂猿獼放意恣陶寫
援筆灑秋泚神怪動窈冥魚鳥覺欣喜路逢丹丘生來
自赤霞城麻姑後飛鳥子晉迭吹笙湖光潋灩開雲壓
蒲萄綠狂引黃金壘嘯歌紫芝曲左蠡素相得當湖忽
見迎揚瀾平一掌中有鼉鼉行振衣扳鵲巢捫蘿踐苔

石崖氣凌空青松花墜階白舉首匡廬下調笑煙霞間
屢會復屢往今往幾時還叢蘭被路蹊芳草縈澗谷長
颺和鳴鶴迸泉驚飲鹿須臾面五老邀我山之陽授我
長生訣兼遺洞玄章問我從東來迢遙汎鯨波三山得
無恙十洲近如何旁招廣成子俯挹山中老鯉魚躍天
江鷁鷺下天治待以青精飯酌以白玉漿乖龍左耳潤
吠犬靈苗香渴鳥漸斂翼拭目增晚碧朵朵金芙蓉憑
虛落胸臆西南挺奇異江湖馳偉觀披披古蘭若丹堊

耀嶺岼嘗聞遠法師堅坐東林下還許陶淵明共結白
蓮社又聞李太白酷愛香鑪峯長安卸塵鞅欲歸巢雲
松往事既云遠顧我復來此濯泉坐繁陰下洗巢由耳
綠髮雙青童采芳留我行我行欲不行月高猿夜聲西
山招我遊明日過湖水笑隔南浦雲遙謝數君子

溯沙河

輕舟溯河流信宿忘少暇委蛇遵大堤荏苒歷初夏晴
光汎流沫川漲益湍瀉游子念遠行假寐待明夜方經

鎬渡灣倏過鶴丘下嚶嚶山鳥鳴的的水花謝愛此堤
上柳緒風一披洒櫂師力張帆中沉去如馬孤烟隔渚
生偶見捕魚者相顧不得言長歌恣陶寫

登忠勤樓聽久孚賀架閣彈琴

畫棟棲朝霞層簷宿秋霧振衣坐前楹援琴寫中素幽
泉鳴澗深落花傷春暮油然聞至音令人起遐慕

夜直與架閣樂秉德期孫伯融不至

雙立碧玉鉗對酌紫薇省長風吹翠梧初月下金井幽

懷鬱未開短髮醉慵整夜分羣籟沈窗虛燭花冷

與樂鳳同使廣陵馬上口占

昔為歌舞地今為爭戰場與君騎瘦馬聯轡蹋斜陽荒
草侵合路苦蒿生過牆遙憐鮑明遠詞賦最淒涼

蘇伯衡

東齋夕書

幽居得自怡野性方愜素高枕一酣眠長廊獨閒步白
日誰云長青山忽已暮皓月照前階涼風滿高樹偶隨

孤鶴行時見疎螢度即此有餘歡何況山中去

送陳思可主簿赴進賢任

一別十五年倏忽若昏旦相逢京城中幸脫戎馬亂宦
遊我何成鬚髮子已換留連一尊酒寂寞四門館剪燭
聽寒雨話舊過夜半居然消百憂莞爾成一粲維子才
且賢文采甚煥爛起從有道徵國光方縱觀謂宜寘館
閣鴻猷藉宣贊如何奉明命鉤考親吏案黎庶乃邦本
疾痛資抑按要將遠猷敷可以小邑翫心懷簡書畏跡

逐萍梗散席挂遇順風潮生失遠岸昨夕簪云盍今朝
袂還判後會復何時臨歧重嗟歎

危素

遊廬山栖賢寺

弱冠好山水竭來廬阜陽憩澗微雨至入林春風香載
經三峽橋地籟聞鏗鏘解帶懸石磴愛此泉流長泄巖
凝素乳灑樹見飛霜泠泠轉空曲湛湛涵清光五老九
千仞巉絕天中央紫煙射仙壑白雲冠僧坊幽思稍愉

悅良朋共翱翔訪古慕宗向悟玄愧裴揚超然色界遊
圓靈大無方終當畢吾志混迹麋鹿行

泊宮步門

人歸石城邊鳥沒白沙尾秋風涼蕭蕭波靜月如洗水
鳬棲不定半夜猶飛起

張以寧

峨眉亭

白酒雙銀瓶獨酌峨眉亭不見謫仙人但見三山青秋

色淮上來蒼然滿雲汀欲將五十絃彈與蛟龍聽

四景山水

春

山雨瀑如雪林寒松未花遙看飛閣起知有梵王家一
僧歸得晚雲濕滿袈裟

夏

崖斷石林合風高雲葉飄人歸雨脚外高閣望中遙應
是天台路幽期在石橋

秋

秋巖白雲晚霜林紅樹多野橋山郭外行子暮來過為
問小搖落江南今若何

冬

寒月白千峯林深路絕蹤遙知僧定起疎響在高松亦
欲剡溪去其如山海重

題海陵石仲銘所藏淵明歸隱圖

昔無劉豫州隆中老諸葛所以陶彭澤歸興不可遏淩

歌譙功臣旌旗蔽轡轡一壺從杖藜獨視天壤濶風吹
黃金花南山在我闥蕭條蓬門秋稚子候明發豈知英
雄人有志不得豁高詠荆軻篇竦然動毛髮

遊句容同林景和縣尹子尚規登僧伽塔賦

嵯峨崇明塔拔地一千丈我攀青雲梯倏到飛鳥上微
風韻金鐸初日麗銀榜維時十月交葉脫天宇曠羣山
東南奔平川疊波浪雲間三茅峰園立儼相向碧瓦浮
鱗鱗茲邑亦云壯雞鳴四關開攘攘異得喪塔中宴坐

仙憐汝在塵埃古時登臨人今者亦何往俯觀世蜉蝣
仰歎彼龍象乃知崑崙巔可以小穹壤同游皆雋英超
遙寄心賞霜飈天際來毛髮颯森爽太白去千年吾何
獨惆悵

鮑恂

寓感

迢迢漢川上有女麗且閒佩以雙明珠遊戲清波間翩
然若飛鴻可望不可攀贈我翡翠羽報之以秋蘭徘徊

碧雲暮引領空長歎

詹同

張氏白石山房詩

浦江有名山白石如積雪王氣亘中天龍湫無六月於
茲隱君子結屋依翠微讀書日平樹看泉風滿衣誰謂
野鶴姿從心自飲啄一落樊籠間清夢繞巖壑豈不念
白石好鍊五色紋獻之補天手歸卧山中雲

吳伯宗

賦得羅漢洞送陳宗進歸會稽

古洞根石壁嵌空隱崔嵬聞昔有異人拄杖曾一來靈
跡已緬邈洞門閉青苔枯木寒未花千年待誰開屬茲
休明運百里紆良材德星麗中天移影照蒼厓鸞鳳詎
棲枳覽輝漫徘徊早見丹穴雛志欲凌九垓定省方縑
綖歸期忽相催還轅過湖口驛路隨縈迴吾知青雲興
却繞蓮花臺風高墜落木歲晏舒寒梅明登會稽頂想
像游天台臨期重回首兩地心悠哉

題李氏棲碧樓

唐有謫仙人風骨特高妙
晚愛棲碧山間心付登眺
桃花與流水目擊領其要
遐觀窮有象幽討入無徼
不知誰相問但覺遺一笑
聲落天地間松風紫鸞叫
諸孫企高躅異世頗同調
瓊樓梯空青銀榜生光耀
予亦愛其人臨風劃長嘯

袁凱

題陶九成南邨草堂

多士方見材斯人乃梧櫟秉心自超越當時識趨舍迨
迨溪南邨流水亦清寫草木發深潤里俗沉淳雅於焉
事結構面勢臨曠野分明治畦町日夕供灌灑秋菰已
堪煮春菰行可謝子真久在谷幼安去諸夏囂雜旣云
遠憂患茲為寡願謝鸞鵠侶從君雞豚社

下直懷北山隱者

載筆侍雲陞向夕始餘閒撫彼清冷觴慰此憂戚顏出
軒月纔皓臨街露已繁廣庭行且止修檻去復攀幽樹

藹深翠餘花發微殷俯仰不知久星漢忽西還歸來空
房卧嚴城漏欲殘鴉鳴九井動劒珮亦珊珊將隨夔龍
後祇肅謁重關緬懷息心侶遺世在雲山焉能從之去
逍遙巖桂間

察院夜坐

吏散車馬寂月色東城上斂衣高堂坐重門靜無響文
奏屏在篋朱墨委虛幌簷影望參差霜氣紛蕩漾耳目
幸無役心意多遐想園廬日應敞蘿蒿春還長況茲網

紀地王事方執掌安得春江櫂東原歸偃仰

淮安道中

花明野館靜樹暗流鶯語行雲千里來凌亂傷心緒傷
心復何事家在江南渚日暮莫回頭脈脈江南雨

京師歸別業

郊園草已遍雜卉駐餘春游絲牽木杪孤鶯鳴水濱
人懷舊居日夕自傷神遙遙千里塗豈復念苦辛欣然
入場圃兒女各來親當軒釋負擔拂去衣上塵老夫行

役久歸來志復伸
陶潛愛清風張生思故尊
援筆為此詩示我鄰里人

新治圃成

隙壤所自治剪剌去龍茸
幸無焚穢雜況此清泉涌
灌滋竟朝夕勾萌各森聳
青蒲已彌澤黃瓜方卧隴
春菁向堪把秋梨日應重
自余通宦籍職事勞紛冗
祿食雖云美私心恒自恐
歸來得蕭茆采擷聊自奉
且遂丘園樂永謝承明寵

復出西郊

步出城西門春岸多沅水嘒嘒沙鴈去荻荻江雲起居
民亦何事南畝將耘耔提攜汀沙際吳語煙霧裏自予
離兵燹廿載勞轉徙歸來展遊眺泫然懷我里餘年幸
有待崔管終可理

書北山精舍壁

夙昔慕幽曠中年值奔走及茲始知返顧已成皓首茲
為山水選風氣固深厚萃律皆巖嶠綿邈盡林藪清泉

瀉幽磴白雪被層阜既多緇素流況有耕釣叟初心已
云協雅言得兼受始來疎梅隨復此山櫻剖庶幾去日
遲誰謂行當久揮手謝朋侶吾將寄衰朽

久旱雨後行園

旱雲不可沮丘園生意窮旨蓄已無遺何以御吾冬昊
天終無極玄化沛神功密雲興四郊飛雨蔽遙空涸池
既堪蕩長溝復淙淙衰茄漸回紫梨亦高垂紅堤柳更
薄陰汀花還短叢荒隴愛登陟平林望青葱即此已愉

悅固知慰疲農愧無詩人德何由歌屢豐

池上二首

秋池行樂去池樹色已暝露下夕衣涼月上風簾靜饑
禽墮疎竹鳴蛩出深井夜久人事息蕭然諸念屏

振衣書齋客逍遙池上步林隈薄霧起石隙幽泉度鷗
迷夕樹返魚觸秋荷去清聲水上来欲去更延佇

偕友人早出郊

離羣寡游豫得朋殊繾綣相將度春水散漫入芳甸班

荆煙乍斂摘花露猶泣林鶯坐未出沙鳥飛還見遙山
浮空翠晴雲曳輕練一聽野人言復起滄洲願

席上懷吳善卿

荒城下餘照高樹留殘雨林靜微花落梁空孤燕語美
人事征討日夕嚴虎旅接袂竟何由持杯望煙渚

詠池上芭蕉

亭亭虛心植冉冉繁陰布既掩猗蘭砌還覆莓苔路卷
舒今自知衰榮隨所寓默契方在茲臨軒挹清醕

鄒園十詠

錄四首

基墅

矗矗林影靜白石況如砥幽幽青苔色離離見屐齒豈
無橘中叟還逢爛柯士日入始言歸相送青川渙

瀑布

青崖瀉沅淙蜿蜒在窗戶臨風噴輕雪穿林散飛雨高
源出無盡餘澗霑還溥羨彼軒中人似坐匡廬下

蓼灘

行迤近橫塘陂陀間幽渚輕穗含夕霏叢條偃秋雨縱
橫覆魚隊闌寂來鷗侶杖策時一臨逍遙更延佇

松壑

矯矯千歲姿生此衆石間微颺度巖阿殷殷起波瀾幽
人一壺酒日夕自怡顏安得川上舟與子相往還

高啓

擬古二首

美人一相見遺我白玉環上有雙雕龍遊戲在雲間持

此感深意佩結無時間王以比貞潔環以明不絕雲龍
永相從誰能使離別

黃鳥鳴春陽沅芳滿西園攀條日已暮悵惋不能言禦
寒必重裘陟道須雙轅離居非君子何以解憂煩煩憂
日已積佳期日已失思君如蓬萊可望不可即區區倘
見察憔悴甘自畢

寓感

志士徇功業貪夫詫輕肥亦有逃羣子矯矯與時違彼

此更共笑不知誰是非
達人體自然出處兩忘機
浮雲游天表舒卷有餘輝

桓褐乘輶輅狐裘駕文車
西門與北宮窮達一何殊
彼達矜已智此窮愧身愚
東郭發至言兩惑各以祛
厚薄有定命巧拙果誰歟
歸卧掩蓬室道存何所吁

始發南門晚行道中

歲暮寒亦行征人有常期
辭我家鄉樂適彼道路危
酒闌別賓親驅車出郊歧
我馬力未痛已越山與陂
回頭

望高城落日雲樹滋遭亂既少安謀生復多飢塗逢往
來人孰不為此馳遠遊亦吾志去矣何勞悲

早過蕭山歷白鶴柯亭諸郵

客起何太早村荒絕雞鳴況時江雨晦不得見啓明淩
兢度高關山空縣無城隔林聞人呼已有先我行側身
避徑滑聚足防厓傾衣寒復多風聒聒遠水聲千峯霧
中過不識狀與名嵐開見前郵始覺歷數程越禽啼楓
簟冷日傍午晴煙生沙墟寂葉落澗寺清登臨亦可悅

但恨時未平

夜抵江上候船至曉始行

夜辭西陵館霜谷叫猿歇津卒未具舟天險不可越漁
商雜候渡寒立沙上月蒼煙隱遙汀益覺漲潮濶開橈
散驚鳬海色曙初發矺矺前山來稍稍後嶺沒中沅聞
鼓角隔岸見城闌客路得奇觀臨風悶俱豁

登海昌城樓望海

百川浩皆東元氣流不息混茫自太古於此見容德積

陰漲玄濤萬里失空色鴻鵠去不窮魚龍變莫測朝登
茲樓望動蕩豁胸臆始知滄溟大外絡九州域日出水底
宮煙生島中國寬疑浸天爛怒欲吹地晏常時烈風興海
若不受職長堤此宵潰頓勞負薪塞況今艱危際民苦在
墊溺有地不可居瀕洞風塵黑安得擊水游圖南附鵬翼

秋懷

明月出遠林流輝鑒牀幃促促草下蟲催我索故衣起
歎秋夜長欲取鳴琴揮掩抑不成弄中心復乖違有懷

難自宣勿謂知音稀

涼風動幽幔高堂夜空虛明燈無與語聊讀古人書古
人亦何人使我不得如棄卷輒還卧終宵自歎歔

朝遊荒岡陞暮行空潭側我非楚大夫何有憔悴色良
辰思遠騁周道廣且直我馬力不前回駕仰偃息踟躕
阻修竹日夕睇西北苟安非予志所懼時未識

弭櫂望江涘日落青楓林驚波駛且廣蕩漾浮雲陰靡
靡皋蘭衰囀囀渚鴻吟顧此凜節謝憂來忽傷心宋子

悲已多潘生歎彌深自古有此愁誰云獨吾今

出郊抵東屯

邕邕雞登場秋稼稍狼藉疎榆陰門巷景暗燈火夕田
家雖作苦於世寡憂戚況當收穫景斗酒復可適所以
沮溺徒躬耕不辭劇

坐久體不適卷書出柴關臨流偶西望正見秦餘山野
淨寒木疎川長暝禽還此中忽有得怡然散襟顏遂同
樵牧歸歌笑落日間

澄景閣夜宴

王孫喜留宴開閣望明河是夕月微暈涼風池上多棲
禽翻暗叢駭魚動圓波清景厭絲竹雅詠荅高歌尊酌
願勿間良宵易蹉跎預憂別在旦車馬層城阿

題陳生畫

前邨夕陽明後嶺秋嵐積葉落露山邨潮來沒江石遙
遙射鴈子慘慘聽猿客何事下征帆西陵渡頭驛

贈張主簿

離離平阜禾纂纂橫林棗客行愛樂土秋晚華亭道停
燭春紡遲鳴榜潭魚早借問何能然年來縣官好

早過南湖

湖黑月未出蒹葭露淒淒榜人識浦溆不畏荒煙迷殘
夢詎可續舟搖櫓聲齊開篷望天邊斗柄插水低津遙
未見樹邨近纔聞雞自嗟遠遊人中宵走東西不如沙
頭鴈宛頸猶安棲

春日言懷

芳樹何靡靡鳴禽亦喈喈時物豈不好人事誠多乖憂
來卧閒房語笑孰與偕天道諒不昧薄願終當諧惟應
守貞靜有酒陶中懷

宿幻住棲雲堂

窗白鳥聲曉殘鐘度溪水此時幽夢迴獨在空山裏松
巖留佛燈葉地響僧履余心方正寂無使羣動起

賦永上人紙帳

剡藤裁素幃坐使諸塵隔冬室自生溫寒窗屢驚白不

隨直省被長覆棲禪簣思曾雪夜時宿伴山中客

聞鐘

迢迢煙際發隱隱巖中應
初來覺寺遙乍歇看山暝
惆悵未眠人空齋幾回聽

聞晚鶯時在圍城中

昨歲聞孤轉綠陰山院行
今朝寢齋雨重聽獨含情
西澗多喬木何為亦到城

送程校理遊江上

風亭裊離管草綠江水暮送此南浦人孤帆雨中渡別
觴足自緩前驛花滿路春叢戀山鶯晚絮迷汀鷺我今
獨愁居芳月誰與度佇立望遙波相思積煙霧

泛南溪二首

山折水暫旋山開水仍往東陂匯初成秋色瀾然廣碧
蘿花茸茸月映石壁上此夕試沿洄一理煙中舫
清暉汎悠悠東與前溪合菱葉間荷花風來秋颯颯久
行愁寂境忽有人煙雜我欲發櫂謳漁師肯相答

水上盟手

盟手愛春水水香手應綠
汙汙細浪起杳杳驚魚伏
惆悵坐沙邊流花去難掬

夢鍾離兩兄

淮水去不極淮山與偕馳
鍾離兩遷客路遠歸何期
孰云歸無期此夕乃見之
握手說辛苦杯觴復同持
須臾忽驚別我夢方自知
雖夢亦足喜況乃歸來時

看刈禾

農工亦云勞此日始告成往獲安可後相催及秋晴父
子俱在田札札鏹有聲黃雲漸收盡曠望空郊平日入
負擔歸謳歌道中行鳥雀亦羣喜下啄飛且鳴今年幸
稍豐私廩各已盈如何有貧婦拾穗猶惇惇

京師嘗吳杭

新杭粲如玉遠漕來中吳初嘗愛精粳想出官田租我
本東皋民少年習耕鋤霜天萬穗熟恣啄從饑烏日暮
刈獲歸妻孥共歡呼茅屋夜春急風雨江村孤晨炊滿

家香薦以出網鱸如今幸蒙恩遨遊在南都門前半區
田別來想已蕪長年盜寸廩補報一事無投匕忽歎息
飽食慙農夫

送周四孝廉後酒醒夜聞鴈聲

別時酒忽醒客去唯空舍風雪鴈聲來寒生石城夜遙
憶渡江船正泊楓林下

贈楊榮陽

嘉陵美山水亦復富文彥楊君產其邦材拔性高狷布

衣走名都早入藝林選客屈稷下談王邀鄴中宴出門
得名聲不假親舊援匣劍未久埋囊錐已先見吐詞實
瑰奇讀者心欲顫刀鳴鬪夫勇花含笑女倩如觀廣場
中百戲張曼衍平生眼無人遇我獨相善陌頭每並出
兩騎無後先喜從兔園遊慙受狗監薦君歌我固服我
賦君亦羨隋筵吟帽烏踏席舞裙茜醉中共笑語往往
雜諧諺有時出城西山水恣攀踐巖眠曙猿驚澗飲夏
鶯囀吳宮妓去榭蕭寺僧開殿龍門剝陰苔高什記題

徧歡遊正相酣世事忽驚變朋儔半生死一往如激電
我棹返江潯君車赴淮甸旋聞逐流人居濠又移汴一
身去何處空橐唯破硯危途晚行疲欲進足如罣狼來
樹杪避蝎走燈下見渡河自撐篙水急船斷縴及至秋
已深舊褐風裂片難尋高陽飲空弔鄢陵戰聖恩忽加
憐收拔佐山縣卑曹敢云辭執版謁府掾官庖盡炊藜
民賦半輸絹低飛蓬蒿間不異雉帶箭有親寓京師年
老關供餼欲奉朝夕歡去職胡敢擅晨上宰相書得歸

遂微願上堂具珍鮭呼婦賣釵釧我時別君久問訊愧
無便空題憶君詩細字書滿卷今春被詔起前史預編
撰始來長干門楊柳正飛燕逢君風塵餘不改舊顏面
握手話苦辛悲喜雜慶唁客中雖無錢自寫賒酒券邀
來卧東閣月出初鎖院君言涉艱難壯志今已倦回頭
悟前非更名慕蘧瑗君今改名去非我聞崇谿金不畏經百鍊
胡為暫失路遽欲老貧賤吾皇奮神武四海始安奠棧
通諭夷文驛走徵士傳時巡抗霓旌肆覲冠星弁功成

萬瑞集禮欲議封禪君才適時需正若當暑扇手持照
國珠曾出補袞線便應上金鑾立對被天眷嗟余忝載
筆鼠璞難自銜幸茲際昌辰魏闕寧不戀但憂誤蒙恩
不稱終冒譴秋風楚潮滿歸舸帆欲轉君若念故交殷
勤一相餞

睡覺

鑪薰霽宿潤秋滿牀屏裏曙色透窗來幽人眠未起風
驚露樹怯日出烟禽喜却憶候東華朝衣寒似水

虎丘次清遠道士詩韻

神仙不可羈乘螭躡雲漢豈將避羸劉荒山事窮窺何
年東觀海一至此峯翫悠悠清詩傳宵宵遺跡漫我來
繼登臨長嘯憤初岸既秋煙蘿疎欲雨風竹亂夜深空
潭黑月吐石壁半龍驚汲僧來鳥喜遊客散閣掩林下
夕鐘鳴巖中旦勝賞誰能窮今古付篇翰飛騰予何之
汨沒余可歎安得契真期超然豁靈贊

龍門

龍門何崢嶸此地表奇蹟山分兩崖青天豁一罅白知
非禹功鑿想是鬼手劈長為風雨關開闔自朝夕深合
未吐雲對峙不崩石日光寒易傾苔色陰更積只疑過
此內便與人境隔始窺已幽深漸入尤險窄暗中把危
藤蜿蜒欲驚魄僧留看古刻敲火照絕壁晚聞松竹號
洶若波浪激不知神魚飛到此誰點額

太湖

長溪如白虹分走荆雲派具區納羣流襟帶三郡界太

虛混鴻濛元氣流
沆瀣初疑溟渤寬
稍覺雲夢隘茫茫
鴈飛遲颿颿帆
度快雨來鼉報鳴
風起鷗驚邁神龍
作淵都豈復數鱗
介珠光照水府不
受白日曬朝看砲
車雲雪浪動澎湃
聲吹地將浮勢擊
山欲壞黃頭雖輕
生捩柁不敢懈有
時湛明鏡峯吐青
幾塊煙中樹若莎
波上舟如芥漁就
沙岸炊客來水祠
拜震澤思禹功夫
椒記吳敗白魚逢
夏出黃柑待秋賣
我性好遊觀夙負
雲水債欲尋鷗夷
舸不顧涉險戒人
生亦何為世故自
拘

械萬事風飄花百年露垂蠶何當叩林屋秉炬訪仙怪
試探不死方為人起痾瘵

劒池

干將欲飛出巖石裂蒼礦中間得深泉探測費修綆一
穴海通源雙崖樹交影山中多居僧終歲不飲井殺氣
凜猶在棲禽夜頻警月來照潭空雲起噓壁冷蒼龍已
化去遺我清絕境聽轉轆轤聲時來試幽茗

松江亭

在吳山垂
虹亭上

泊丹登危亭江風隋輕幘空明入遠眺天水如不隔日
落震澤浦潮來松陵驛綿綿州溆平莽莽葭菼積憑闌
不敢唾下有龍窟宅帆歸雲外秋鳥下煙中夕欲炊菰
米飯待月出海白喚起弄珠君閒吹第三笛

寒泉

在支
硯山

遠絡叢峯間平流磐石上月照欲成潭風吹不生浪聲
兼寒葉下色映秋苔漲野客照羸顏曾來倚筇杖

柳絮

輕盈易飄泊思逐春雲亂已拂武昌門還縈灞陵岸沙
頭雀啄隋水面魚吹散官樹曉茫茫哀歌腸欲斷


夜起觀月

一春夜多雨今宵初月明窗間幽夢覺起憶故園行露
下花微委煙中鳥忽鳴誰同賞清景惆悵倚前楹

舟中早行

隆隆津鼓動江火留餘閃人家未起畊近水寒扉掩船
開鳬鴨散樹吐煙霏斂東郭去方遙青山見孤點

御選明詩卷十六



總校官庶吉士臣侍朝

校對官檢討臣蕭九成

謄錄監生臣傅瓌芳